

**BARAAEY CHEHLUM (20 SAFAR)**

JAHAAÑ MEIÑ AAJ IBNE SAQIYE KAUSAR KA CHEHLUM HAI  
QATEEL'E RAAH'E HAQ, SARDAARE BAHR O BAR KA CHEHLUM HAI

RAHI JALTI ZAMEEÑ PAR LAASH JIS MAZLOOM KI URYAAN  
USI SHAAHE DO AALAM, KUSHTAEY KHANJAR KA CHEHLUM HAI

JO SAQQAAEY SAKINA AUR ALAMBARDAARE LASHKAR THA  
USI DILBANDE HAIDER, GHAAZIO SAFDAR KA CHEHLUM HAI

QALAM SHAANE HUEY DARYA PA JISKE, ROAZE AASHOORA  
KARO MAATAM KE AAJ USS SAANIYE JAAFAR KA CHEHLUM HAI

SINAAÑ SEENE PA KHA KE, JIS NE APNI JAAN DI RUN MEIÑ  
USI NOORE NIGAAHE SHAAHE DEEÑ, AKBAR KA CHEHLUM HAI

JAWAANI ROAEGI JISPAR QAYAAMAT TAK ZAMAANE MEIÑ  
USI KARYAL JAWAAN HUMSHAKLE PAIGHAMBER KA CHEHLUM HAI

NA JO PUSHT'E FARAS PAR, KAMSINI SE BAITH SAKTA THA  
ZAMAANE MEIN USI LAKHTE DILE SHAPPAR KA CHEHLUM HAI

SHUJA'AT AUR GHAI RAT, JIS KE SIN PAR FAKHR KARTI THI  
USI NAASHAADO KAMSIN, QASIM'E MUZTAR KA CHEHLUM HAI

BARHAAYA DOODH JISKA HURMALA NE, APNE PAIKAAÑ SE  
AZEEZON AAJ USS NAADAAN, ALI ASGHAR KA CHEHLUM HAI

HUA THA QATL JO JO NUSRATE SHAAHE DO AALAM MEIÑ  
URAAO KHA AK AAJ UN GHAAZIYO SAFDAR KA CHEHLUM HAI

TUJHE AEY FIKR\* JISKI QABR PAR JAANE KI HASRAT HAI  
USI MAZLOOM, TASHNA LAB, SHAHE BE\_SAR KA CHEHLUM HAI